

南北史合注

欽定四庫全書

南北史合注卷一百六十一

明李清撰

列傳第六十三

北史七十五

趙斐

趙芬

王韶

元巖

宇文弼

伊婁謙

李圓通

陳茂

郭榮

龐晃

楊尚希

張熒

蘇孝慈

元壽

趙熒字通賢天水西人父仲懿尚書左丞熒少孤養母至孝年十四有盜伐其父墓樹熒對之號慟因執送官見魏僕射周惠達長揖不拜自述孤苦涕淚交集惠達為隕涕歎息者久之及長沈深有器局略涉書記周文帝引為相府參軍從破洛陽及班師熒請留撫納亡叛

從之乃帥所領與東魏人前後五戰斬獲甚衆以功封
平定縣男累轉中書侍郎周孝閔受禪遷陝州刺史蠻
酋向天王以兵攻信陵种歸熒襲擊破之二郡獲全時
周人於江南岸置安蜀城以禦陳屬霖雨數旬城頽百
餘步蠻酋鄭南鄉叛引陳將吳明徹欲掩安蜀議者皆
勸熒益修守禦熒不從乃遣使說誘江外生蠻向武陽
令乘虛掩襲南鄉所居獲其父母妻子南鄉聞之其黨
各散陳兵亦遁明年陳吳明徹屢為寇患熒與前後十

六戰每挫其鋒以功授開府儀同三司再遷戶部中大
夫周武帝欲收齊河南地熒諫曰河南洛陽四面受敵
縱得之不可守請從河北直指太原傾其巢穴可一舉
定帝不納師竟無功尋從上柱國于翼自三鴉道伐陳
克十九城而還以諛功不錄累遷御正上大夫熒與宗
伯斛斯微素不協微後出為齊州刺史坐事下獄自知
罪重遂踰獄走帝大怒購之甚急熒密奏曰微自以罪
重懼死遁逃若不北走匈奴則南奔吳越微雖愚陋久

歷清顯奔彼敵國無並聖朝今炎旱為灾可因茲大赦
帝從之徵賴而免熒卒不言隋文為丞相加上開府再
遷大宗伯及踐阼熒授璽綬進大將軍以熒習故事拜
尚書右僕射未幾以忤旨出為陝州刺史轉冀州刺史
甚有威惠熒嘗有疾士民奔馳爭為祈禱其得民情如
此冀州市井多姦詐熒為銅斗鐵尺置於肆民間便之
帝命頒之天下以為常法嘗有人盜熒田中蒿為吏所
執熒曰此刺史不能風化耳彼何罪慰諭遣之令人載

蒿一車賜盜者盜愧過於重刑帝幸洛陽謁來朝帝勞之卒於官子義臣位太子洗馬煬帝立以同漢王諒起兵誅

趙芬字士茂天水西人父演周秦州刺史芬少有辨智涉經史周文引為相府記室累遷開府儀同三司性彊濟所居職皆有聲績周武帝親提萬機拜內史下大夫轉小御正明習故事每朝廷疑議衆不能決者芬輒為評斷莫不稱善累遷東京小宗伯鎮洛陽隋文為丞相

尉遲迴與司馬消難合謀往來芬察知之密白隋文深
見親委開皇初拜尚書右僕射與郢公王誼修律令俄
兼內史令甚見信任未幾以老病出為蒲州刺史加金
紫光祿大夫仍領關東運漕賜錢百萬粟五千石而遣
之後數年上表乞骸徵還京師賜以二馬輅車几杖被
褥歸于家皇太子又致巾帔數年卒遣使致祭鴻臚監
護喪事少子元楷煬帝大業中為歷陽郡丞與廬江郡
丞徐仲宗俱竭民產貢帝仲宗遷南郡丞元楷起拜江

都丞兼領江都宮監

王韶字子相世居京兆父諒早卒韶幼而方雅頗好奇節識者異之在周累以軍功歷車騎大將軍儀同三司周武帝拔晉州意欲旋師韶諫曰

隋書載韶諫曰齊失紀綱于茲累世天獎王室一戰而扼其喉加以主昏於上民懼於下

取亂侮亡正存今日釋之而去臣所未解帝大悅及齊平進開府晉陽縣公賜口馬雜畜萬計隋文帝受禪進

爵項成郡公加大將軍晉王廣鎮并州除行臺右僕射
韶剛直王甚憚之每事諮詢不敢違法度韶常奉使檢
長城王因穿池起三山韶還自鎮而諫王謝而罷之帝
聞而嘉嘆賜金百兩并後宮四人平陳之役以本官為
元帥府司馬

隋書曰與高頴支度軍機無所壅滯

及克金陵韶即鎮焉晉王班師留韶于石頭防遏委以
後事歲餘徵還帝謂公卿曰晉王以幼出藩遂能克平

吳越王子相之力也進柱國及駕幸井州以其稱職特加勞勉後謂曰自朕至此公鬚鬢漸白無乃憂勞所致柱石之望唯在于公勉之韶辭以老帝勞而遣之秦王俊為井州總管仍為長史歲餘馳驛入京勞弊而卒帝甚傷惜之謂秦王使者曰語爾王我前令子相緩來如何乃遣馳驛殺我子相豈不由汝言甚悽愴使有司為立宅曰往者何用宅為但表我心耳又曰子相受我委寄十有餘年終始不易寵章未極舍我而死乎發言流

涕因命取子相封事數十紙傳示羣臣曰其直言匡正
裨益甚多吾每披尋未嘗釋手煬帝即位追贈司徒尚
書令靈幽等十州刺史魏國公子士隆嗣略知書計尤
便弓馬慷慨有父風大業世頗見親重位備身將軍改
封耿國公東恭帝即位士隆率數千兵自江淮至會王
世充僭號甚禮重之署尚書右僕射憂憤疽發背卒
元巖字君山河南洛陽人父禎魏數州刺史巖好讀書
不守章句剛鯁有器局以名節自許少與勃海高潁太

原王韶同志友善仕周累遷內史中大夫周宣帝嗣位
為政昏暴京兆郡丞樂運與襯詣朝堂陳帝八失言甚
切至帝大怒將戮之朝臣莫敢救巖謂人曰臧洪同日
尚可俱死況比干乎若樂運不免吾將與之俱斃詣閤
請見言於帝曰樂運知書奏必死所以不顧身命欲取
後世名陛下若殺之乃成其名落其術內不如勞而遣
之以廣聖度運因獲免後帝將誅王軌巖不肯署詔御
正顏之儀切諫不入巖進繼之脫巾頓顙三拜三進帝

曰汝欲黨王軌耶巖曰臣非黨軌正恐濫誅失天下望
帝怒使閹豎搏其面遂廢于家隋文受禪拜兵部尚書
爵平昌郡公巖性嚴重明達世務每有奏議侃然正色
廷爭面折無所迴避帝及公卿皆敬憚之時帝懲周代
諸王以微弱滅亡由是分王諸子權侔王室為磐石之
固遣晉王廣鎮并州蜀王秀鎮益州二王年幼皆選貞
良有重望為之寮佐時巖與王韶為河北道行臺僕射
隋書曰時巖與王韶俱以骨鯁知名物議稱三人才

具侔于高頗由是拜韶為河北道行臺右僕射巖為
益州提管長史 愚按二人官職各別不知北史河
以混稱

帝謂曰公宰相大器今屈輔我兒亦如曹參相齊之意
及巖到官法令明肅吏民稱之蜀王好奢嘗欲取獠口
為閹人又欲生剖死囚取膽為藥巖皆不奉教排閹切
諫王輒謝而止憚巖為人每循法度蜀中獄訟巖所裁
斷莫不悅服有得罪者謂曰平昌公與吾罪吾何怨焉

帝甚嘉之賞賜優洽卒于官帝悼惜久之益州父老莫不隕涕于今思之巖卒後蜀王為非法造渾天儀又共妃出獵以彈彈人多捕山獠充官者寮佐無能諫止及秀得罪帝曰元巖若在吾兒豈有是乎子弘嗣

宇文弼字公輔河南洛陽人其先與周同出父珍周宕州刺史弼慷慨有大節博學多通仕周嘗奉使鄧至國及黑水龍涸諸羌前後降附三十餘部及還奉詔修定五禮書成奏之累遷少吏部推八人為縣令皆有異績

世以為知人武帝將謀出兵河陽伐齊弼進策曰齊氏建國于今累世雖曰無道藩鎮之任尚有其人今若用兵須擇其地河陽要衝精兵所聚盡力攻圍恐難得志彼汾之曲成小山平攻之易拔用武之地莫過于此帝不納師竟無功建德五年大舉伐齊卒用弼策于是募三輔豪俠少年數百人為別隊從帝攻拔晉州身被三鎗若戰不息帝奇而壯之因從平齊之功乃拜上儀同宣帝嗣位突厥寇甘州帝令侯莫陳昶擊之弼謂監軍曰

隋書載弼曰黠鹵之勢來如激矢去如絕絃若欲追
躡良為難及

宜選精騎直趨祈連之西賊若收軍必自蓼泉之北此
地險隘兼下濕度其人馬三日方渡彼勞我逸破之必
矣若邀此路真上策也祖不能用西取合黎大軍行遲
鹵已出塞其年弼又從梁士彥攻拔壽陽改封安樂縣
公轉南司州刺史司馬消難奔陳弼追之不及遇陳將
樊毅戰于漳口自旦及午三戰三捷開皇初以前功封

平昌縣公入為尚書右丞時西羌內附詔攷持節安集
置鹽澤蒲昌二郡而還遷左丞當官正色為百寮所憚
三年突厥寇甘州以行軍司馬從元帥竇榮定擊破之
平陳之役楊素出信州道令攷持節為諸軍節度仍領
行軍總管劉仁恩破陳將呂仲肅攷有謀焉加開府擢
拜刑部尚書領太子虞候卒帝嘗親臨釋奠攷與博士
論議詞致清遠帝大悅謂羣臣曰朕今觀周公制禮見
宣尼論孝實慰朕心時朝廷以晉陽為重鎮并州總管

必屬親王其長史司馬亦一時高選前長史王韶卒以
弼有文武幹用出為并州長史十八年遼東之役授元
帥漢王府司馬仍領行軍總管軍還歷朔代吳三州總
管皆有能名煬帝即位拜刑部尚書仍特節巡省河北
還累轉禮部尚書弼既以才能著稱歷職顯要聲望甚
重物議多見推許帝頗忌之時帝漸好聲色尤勤遠畧
弼謂高頴曰昔周天元好聲色亡國以今方之不亦甚
乎又言長城之役非急務有人奏之坐誅天下寃之所

著辭賦二十餘萬言為尚書孝經注行于世有子儉
伊婁謙字彥恭本鮮卑人其先世為酋長

北魏孝文改為伊氏至周復舊者見魏書氏族志

隨魏南遷父靈相隆二州刺史謙性忠直善辭令仕周
累遷使持節驃騎大將軍武帝將伐齊召入內殿問以
兵事對曰偽齊沈溺倡優耽昏趨藥其折衝之將斛律
光已斃讒口上下離心道路以目若命六師齊進此易
取也帝大笑使謙與小司寇元偉聘齊觀釁帝尋發兵

齊後主令其僕射陽休之責謙曰貴朝盛夏徵兵馬首
何向答曰僕憑軾之始未聞興師設復有之西增白帝
之城東益巴邱之戍豈足怪哉謙參軍高遵以情諭齊
遂留謙不遣帝既克并州召謙勞之執遵付謙任令報
復謙頓首請赦之帝曰卿可聚衆唾面令知愧也謙跪
曰遵罪又非唾面之責帝善其言而止謙竟待遵如初
累遷前驅中大夫大象中再進爵濟陽縣侯位開府隋
文作相授亳州總管俄徵還京自言耽與逆人王謙同

名因稱字

愚按王謙起兵討權臣乃周忠臣也何云逆人如謙稱字以媚堅反為順耶

文帝受禪拜大將軍進爵為公後出為澤州刺史清約自處甚得民和以疾去職吏民攀戀行數百里不絕卒於家

李圓通京兆涇陽人少孤賤

隋書曰父景以軍士隸武元帝家與家僮黑女私生

圓通景以為子

給使隋文家及為隋公推授參軍事初帝少時每宴客恒令圓通監厨圓通性嚴整左右婢僕咸敬憚唯世子乳母恃寵輕之賓客未供每有干請圓通不許或輒持去圓通大怒叱厨人撾之數十呼聲徹閣內僚吏左右代為失色賓去後帝知之召圓通命坐賜食從此獨善之以為堪當大任帝作相授帥都督委以心膂圓通多力勁捷長於武用周氏諸王素憚帝伺便圖為不利賴

圓通保護獲免者數矣帝深感之由是參預政事授相
國外兵曹仍領左親信尋授上儀同帝受禪再進爵至
伯歷尚書左丞攝刑部尚書深被信任伐陳之役以行
軍總管從楊素出信州道以功進大將軍封萬安縣公
揚州總管長史秦孝王仁柔自喜少斷決府中事多決
於圓通兩遷刑部尚書後復為并州長史秦王以奢得
罪圓通亦坐免仁壽中以勲舊進爵郡公煬帝嗣位拜
兵部尚書帝幸揚州以圓通留守京師判宇文述田還

民述訴其受賂帝怒坐免圓通憂懼發病卒贈柱國子
孝常唐武德初以應義旗功封義安王又有陳茂者河
東猗氏人家世寒微質直恭謹為州里所稱隋文為隋
國公時引為寮佐待遇與圓通等每令典家事常稱旨
後從隋文與齊師戰晉州賊甚盛隋文將挑戰茂固止
不得因捉馬鞍隋文怒拔刀斫其頭流血被面詞氣不
撓隋文感而謝之厚加禮敬為丞相委以心膂及受禪
拜給事黃門侍郎每典機密轉並州總管司馬遷太府

卿兩進爵至魏城縣伯卒官子政嗣個儻有文武大略
善鐘律便弓馬少養宮中年十七為太子千牛備身京
都大俠劉居士重政才氣數從之遊圓通子孝常與政
相善並與居士交結及居士誅政及孝常從坐帝以功
臣子捷二百赦之由是不得調煬帝時歷兵曹承務郎
帝以其才甚重之宇文化及之亂以為太常卿後歸唐
為梁州總管遇賊見殺

郭榮字長榮自云太原人父徽仕西魏為同州司馬時

武元帝為刺史由是與隋文有舊帝受禪拜太僕卿卒
官榮容貌魁岸外跡內密與交者多愛之周大冢宰宇文
護引為親信察榮謹愿擢為中外府水曹參軍齊寇
屢侵護令榮於汾州觀賊形勢時汾州與姚襄鎮相去
懸遠榮以二城孤迫勢不相救請於州鎮間更築城以
相控攝護從之俄齊將段韶攻陷姚襄汾州二城惟榮
所立者獨能自守護作浮橋出兵韶先於上流縱大筏
擊浮橋護令榮督便水者引取其筏以功授大都督護

又以稽胡數為寇亂使榮集之榮於上郡延安築周昌
弘信廣安招遠咸寧等五城遏其要路稽胡不能為寇
從周武平齊以功封平陽縣男遷司水大夫榮少與隋
文親狎嘗與夜坐月下謂榮曰吾仰觀玄象俯察人事
周歷已盡我其代之際深自結納未幾周宣崩隋文總
百揆召榮撫其背笑曰吾言驗矣即拜相府樂曹參軍
文帝受禪引為內史舍人以龍潛之舊進爵蒲城郡公
位上儀同仁壽初西南夷獠多叛詔榮領八州諸軍事

行軍總管討平之煬帝即位入為武侯驃騎大將軍以
嚴正聞後黔安首領田羅駒阻清江作亂夷陵諸郡民
夷多應者詔榮擊平之遷左侯衛將軍遼東之役以功
進左光祿大夫明年帝復事遼東榮以為中國疲弊萬
乘不宜屢動乃言于帝請止行

隋書載榮言曰戎狄失禮臣下之事臣聞千鈞之弩
不為鼷鼠發機豈有親辱大駕以臨小寇

帝不納復從軍攻遼東城榮親蒙矢石晝夜不釋甲冑

帝知之大悅每勞勉之帝後以榮老欲出為郡榮陳請
不願違離頓首辭讓帝哀之拜右僕衛大將軍後數日
帝謂百寮曰郭榮誠心純至固無比矣楊玄感之亂帝
令馳守太原明年從帝至柳城

隋書曰榮遇疾帝令存問動靜中使相望

卒於懷遠鎮帝為廢朝贈兵部尚書諡曰恭

龐晃字元顯榆林人父糾周驃騎大將軍晃良家子周
大署大都督領親信兵常置左右晃因徙居關中後遷

驃騎將軍衛王直出領襄州晃以本官從尋與長湖公
元定等江南孤軍深入汶于陳數年衛王直遣晃弟車
騎將軍元儁賫絹八百匹贖馬乃得歸拜上儀同後事
隋文弟衛王爽時隋文出為隨州刺史路經襄陽爽令
晃詣隋文晃知隋文非常人深自結納及隋文去官歸
京師晃迎見襄邑隋文甚歡與晃同飯晃因曰公相貌
非常名在圖錄九五之日幸願不忘隋文笑曰何妄言
也頃之一雄雉鳴于庭隋文令晃射之曰中則有貴富

金史卷一百六十一
貴日持以為驗

隋書曰晃既射而中帝大笑曰此天意也公感之而
中耳因贈以二婢情契甚密

及隋文受禪與晃言及之

隋書載帝謂晃曰射雉之符今日驗否

晃再拜曰陛下君臨宇內猶憶曩時言耶帝笑曰公此
言何得忘也尋加上開府進爵北陽縣公河間王弘擊
突厥

隋書曰晃以行軍總管從至馬邑迂路出賀蘭山擊賊破之 愚按本史必有此一段或刊者遺之觀上句自見

晃性剛悍時廣平王雄當途用事勢傾朝廷晃每陵侮之嘗于軍中卧見雄不起雄甚銜之復與高頴有隙二人屢譖晃由是宿衛十餘年官不得進卒于原州總管帝為廢朝謚曰敬

楊尚希弘農人父承寶商直浙三州刺史尚希紹亂而

孤年十一辭母請受業長安范陽盧辯見而異之令入
太學專精不倦同輩皆推服周文嘗親臨釋奠尚希時
年十八令講孝經詞旨可觀周文奇之賜姓普六茹氏
擢國子博士明武世賜爵高都侯官至東京司憲中大
夫尋撫慰山東河北至相州而宣帝崩與相州總管尉
遲迴發喪于館尚希出謂左右曰蜀公哭不衰而視不
安將有他計不去將及難遂夜遁及明迴方覺令數十
騎追之不及遂歸京師隋大以尚希宗室之望又背迴

至待之甚厚及迴屯兵武陟遣尚希領宗室兵三千人
鎮潼關尋授司會中大夫隋文受禪拜度支尚書進爵
為公歲餘出為河南道行臺兵部尚書加銀青光祿大
夫尚希時見天下州郡過多表言

冊府元龜曰自秦并天下罷侯置守漢魏及晉邦邑
屢改

今郡縣倍多于古或地無百里數縣並置或戶不滿千
二郡分領具寮以衆資費日多吏卒又倍租調歲減清

幹良材百分無一動須數萬如何可充所謂民少官多
十羊九牧今存要去開併小為大國家則不虧粟帛選
用則易得賢才帝覽而嘉之遂罷天下諸郡後歷兵部
禮部二尚書授上儀同尚希性惇厚兼以學業自通甚
有雅望為朝廷所重帝時每旦臨朝日側不倦尚希諫
曰陛下宜舉大綱責成宰輔繁碎之務非人主所能親
帝歡然曰公愛我者尚希有足疾謂曰蒲州出美酒堪
養病屈公卧臨之乃拜蒲州刺史仍領本州宗國驛騎

尚希在州甚有惠政復引漢水立隄防開稻田數千頃
民賴其利卒官謚曰平

張斐字士鴻河間鄭人父羨少好學多所通涉仕魏為
蕩難將軍從軍武入關周文引為從事中郎賜姓叱羅
氏爵虞鄉縣公累遷司成中大夫典國史周代公卿類
多武將唯羨素業自通甚為當時所重後以老致仕隋
文受禪欽其德望以書徵之及謁見勅令勿拜扶杖升
殿帝降榻執手與同坐宴語久之賜以几杖會遷都龍

首羨上表以儉約勸優詔答之卒贈滄州刺史謚曰定
所撰老子莊子義名曰道言二十五篇熒好學有父風
仕魏位員外侍郎周文引為外兵曹明武宣三朝累加
儀同隋文為丞相熒深自推結隋文以幹用親遇之及
受禪拜尚書右丞三進爵至北平縣侯遷太府少卿領
營新都監父憂去職柴毀骨立未葬

隋書曰起令視事固讓不許

授儀同三司襲爵虞鄉縣公歷戶部尚書熒性和厚有

識度甚有當時譽兩為冀州刺史吏民悅服稱二千石
卒官開皇中有劉仁恩者政績為天下第一擢拜刑部
尚書以行軍總管從楊素伐陳與素破陳將呂仲肅於
荆門仁恩計功居多授上大將軍甚有當時譽馮翊郭
均上黨馮世恭並明悟有幹畧相繼為兵部尚書此三
人俱顯名於世然事行闕落史莫能知

蘇孝慈扶風人父武周兗州刺史孝慈沉謹有器幹美
容儀仕周位工部中大夫隋文受禪拜太府卿時王業

初基微天下匠纖微之巧無不畢集孝慈總其事世以
為能歷兵部尚書待遇愈密時皇太子勇頗知時政帝
欲重官官之望多令大臣令其職拜孝慈太子右衛率
尚書如故及于陝州置常平倉轉輸京下以渭水多沙
乍深乍淺乃決渭水為渠以屬河令孝慈督其役渠成
帝善之又領太子左衛卒仍判工部戶部二尚書稱為
幹理轉工部尚書先是百寮供費不足臺省府寺咸置
廨錢收息取給孝慈以為官與民爭利非興化之道表

請公卿以下給職田有差帝並納之及將廢太子憚其
在東宮出為浙州刺史太子以孝慈去形于言色其見
重如此遷洪州總管俱有惠政後桂林山越相聚為亂
詔孝慈為行軍總管擊平之卒官孝慈兄子沙羅仕周
以破尉遲迥功授開府儀同三司開皇中歷資邱二州
刺史

隋書曰冉龍羗作亂攻汶山金川二鎮沙羅率兵擊
敗之

後以大將軍檢校益州總管長史及蜀王彥廢沙羅坐除名卒

元壽字長壽河南洛陽人祖敦魏侍中邵陵王父寶周涼州刺史壽少孤性仁孝九歲喪父哀毀骨立宗族鄉黨咸異之事母以孝聞及長方直頗涉文史周保定四年封儀隴縣侯授儀同三司隋開皇初議伐陳以壽有思理使於淮浦監修舟艦以強濟見稱累遷尚書左丞文帝嘗出苑觀射文武並從開府蕭摩訶妻安氏病且

死摩訶奏請遣于世略向江南收其家產御史見而不
言壽奏劾之曰御史之官義存糾察憲典誰寄今月五
日鑒興從蹕親臨射苑開府儀同三司蕭摩訶幸廁朝
行預觀盛禮奏稱請遣于世略暫往江南收家產妻安
遇患彌留有日安若長逝世略不合此行竊以人倫之
義伉儷為重資愛之道烏烏弗虧摩訶遠念資財近忘
匹好一言纔發名教頓盡而兼殿內侍御史臣韓徵之
等竟不彈糾若知非不舉情涉阿縱如不以為非豈關

理識儀同三司太子左庶子檢校書侍郎史臣劉行本
虧失憲體何所逃愆臣忝左轄謹以狀聞帝嘉納之後
授太常少卿出為基州刺史有公廉稱入為太府少卿
進開府煬帝嗣位漢王諒起兵左僕射楊素為行軍元
帥壽為長史事平以功授大將軍大業四年拜內史令
從帝西討吐谷渾壽率衆屯金山東南連營三百餘里
以圍渾主還拜右光祿大夫七年兼左翊衛將軍從征
遼東在道卒帝哭之甚慟贈尚書右僕射光祿大夫

金石錄載壽碑云贈尚書左僕射光祿大夫封博平侯史不載予詳錄其贈蓋以罪壽子敏之黨逆辜恩也

謚曰景子敏見逆臣

論曰二趙明習故事當世咸推及居端右無聞殊績故知人之分器各有量限大小云異不可相踰晉蜀二王帝之愛子擅以權寵莫拘憲法王韶元巖任當彼相並見嚴憚莫敢為非褻諤之風有足稱矣宇文弼寓量宏

遠聲望攸歸斯言不密以致傾殞惜夫伊婁謙志識弘
深不念舊惡請赦高遵之罪有君子風焉

愚按北事也以私情廢國法兩者俱失何云有君

李圓

龍晃等或陳力經綸或自結龍潛高位殊

寵豈徒然哉楊尚希譽望隆重張奭蘇孝慈咸稱貞幹

並擢自開皇之初蓋當時之選也元壽彈行本意存名

教然計功稱伐益不足云端揆之贈優矣

南北史合注卷一百六十一

欽定四庫全書

南北史合注卷一百六十二

明李清撰

北史七十六

來護兒

周羅暉

劉權

周法尚

李景

衛玄

薛世雄

段文振北海期原人父威周泚河甘渭四州刺史文振
少有膂力膽智過人明達世務周冢宰宇文護知其有
幹用擢授中外府兵曹後從周武帝攻齊海昌王尉相
貴於晉州其亞將侯子欽崔景嵩為內應文振杖槊與
崔仲方等數十人先登城文振隨景嵩至相貴所拔佩
刀刼之相貴不敢動城遂下及攻井州陷東門而入齊
安德王延宗懼而出降

愚按延宗力屈被擒未嘗降也奈何寬之

錄前後勲拜上儀同賜爵襄國縣公又進平鄴都後從
滕王逌擊稽胡破之又以天官都上士從韋孝寬經略
淮南俄尉遲迴舉義特文振老母妻子俱在鄴迴遣人
誘之文振不顧隋文引為丞相掾司馬消難奔陳令文
振安集淮南後以行軍長史從達奚震討平叛蠻遷鴻
臚卿為石河二州刺史甚有威惠遷蘭州總管改封龍
崗縣公突厥犯塞以行軍總管擊破之遂北至居延塞

開皇九年大舉伐陳為元帥秦王司馬別領行軍總管
及平江南累遷雲州總管太僕卿十九年突厥犯塞以
行軍總管破達頭可汗于沃野文振先與王世積有舊
初文振北征世積遺以馳馬北還世積以罪誅文振坐
與交關切遂不錄後平越雋叛蠻賜奴婢二百口仁壽
初嘉州獠反文振以行軍總管討之引軍山谷間為賊
所襲遂大敗文振復收散兵擊其不意竟破之文振性
剛直無所降下初軍次益州謁蜀王秀貌頗不恭秀甚

銜之及此奏文振師徒喪亂右僕射蘇威與文振有隙
因譖之坐除名及秀廢黜文振上表自申帝慰諭之授
大將軍拜靈州總管煬帝即位徵為兵部尚書待遇甚
重從征吐谷渾文振督兵屯雪山連營三百餘東接楊
楊義臣西連張壽合圍渾主於覆袁川以功進右光祿
大夫帝幸江都以文振行江都郡事文振見大帝時容
納突厥啟民居於塞內妻以公主賞賜重疊及大業初
恩澤彌厚恐為國患乃上表

隋書載表曰竊見國家容受啟民資其兵食假以地利竊所未安何也夷狄之性無親而貪弱則歸投強則反噬其本心也梁化侯景近事之驗以臣量之必為國患

請以時喻遣出塞然後明設烽候緣邊鎮防務令嚴重此萬世長策時兵部侍郎斛斯政專掌兵事文振知政險薄不可委以機要屢言于帝並弗納及遼東之役受左候衛大將軍出南蘇道在軍疾篤表言遼東小醜親

勞萬乘但夷狄多詐深須防擬口陳降款心懷背叛詭
伏多端勿得便受水滌方降不可淹遲惟願嚴勒諸軍
星馳速發水陸俱前出不意意則平壤孤城可拔傾其
本根餘城自克如不時定脫遇秋霖深為艱弊兵糧既
竭強敵在前踈竭出後遲疑不決非上策也卒於師帝
省表悲嘆贈光祿大夫尚書右僕射北平公謚曰襄次
子綸少以俠氣聞文振弟文操大業中為虎賁郎將性
甚剛嚴帝令督秘書省學士時學士頗存儒雅文操輒

捷之前後或至千數時議鄙之

來護兒字崇善本南陽新野人漢中郎將欽十八世孫
曾祖成徙居廣陵因家焉父法敏仕陳終海陵令護兒
未識而孤養於世母吳氏吳氏提携鞠養甚有慈訓幼
而卓犖初讀詩至擊鼓其鏜踊躍用兵羔裘豹飾孔武
有力因捨書歎曰大丈夫在世當如是會為國滅賊以
取功名安能區區事筆硯也羣輩驚其言而壯其志及
長雄略秀出志氣英遠涉獵書史不為章句學始侯景

之亂護兒世父為鄉人陶武子所害吳氏每流涕言於
護兒武子宗人數百家厚自封植護兒每思復怨因其
有婚禮乃結客數人直入其家引武子斬之賓客皆懾
不敢動乃以首際伯墓潛伏歲餘會周師定淮南乃歸
鄉里所住白土村地居疆場數見軍旅獲兒常慨然有
立功名之志及開皇初宇文忻賀若弼等鎮廣陵並深
相禮重除大都督領本鄉兵破陳將魯永以功授儀同
三司平陳之設護兒有功焉進上開府十一年高智慧

據江南反以總管統兵隨楊素討之賊據浙江岸為營
周三百餘里舟艦被江鼓譟而進護兒言於素曰吳人
輕銳利在舟楫必死之賊難與爭鋒公且嚴陣待之勿
與接乃請假奇兵數千潛渡江掩破其壁使退無所歸
進不得戰此韓信破趙策也素然之護兒乃以輕舸數
百直登江岸襲破其營因縱火煙焰張天賊顧火而懼
素乘其懼一鼓破之智慧逃於海護兒追至閩中餘黨
皆平進大將軍除泉州刺史封襄陽縣公護兒招懷初

附威惠兼舉璽書勞問前後相屬時智慧餘黨盛道延
阻兵為亂護兒又討平之遷建州總管又與蒲山公李
寬討平黔歛逆黨汪文進進柱國封永寧郡公文帝嘉
其功使畫工圖像以進十八年詔追入朝賜以宮女寶
刀駿馬錦綵等物仍留長子楷為千牛備身使護兒還
職仁壽初還瀛州刺史以善政聞頗見勞勉煬帝嗣位
被追入朝百姓攀戀累日不能出境詣關上書致請者
前後數百人帝謂曰昔國步未康卿為名將今天下無

事又為良二千石可謂兼美矣除左驍衛大將軍至右
翊衛大將軍封榮國公恩禮隆密朝臣無比大業六年
駕幸江都謂護兒曰衣錦晝遊古人所重卿今是也乃
賜物二千段并牛酒令謁先人墓宴鄉里父老仍令三
品已上集其宅酣飲盡日朝野榮之遼東之後以護兒
為平壤道行軍總管兼檢校東萊太守率樓船指滄海
入自涓水去平壤六十里高麗王高元掃境內兵拒之
列陣數十里諸將咸懼護兒笑謂副將周法尚及軍吏

曰吾本謂其堅城清野以待王師今來送死當殄之而朝食高元弟建驍勇絕倫率敢死數百人來致師護兒命武賁郎將費青奴及第六子左千牛整馳斬其首乃縱兵追奔直至城下俘斬不可勝計因破其郭營於城外以待諸軍高麗盡閉城門不敢出

隋書曰時縱兵大掠稍失部伍高元弟建武募敢死士五百邀擊護兒因却屯營海浦以待期會

會宇文述等衆軍皆敗乃旅軍以功賜物五千段以第

五子弘為杜城府鷹揚郎將以先封襄陽公賜其子整
明年又出滄海道師次東萊會楊玄感反進攻洛陽護
兒聞之召裨將周法尚議旋軍討逆法尚等咸以無敕
不宜擅還再三不從護兒厲聲曰洛陽被圍心腹之疾
高麗逆命猶疥癬耳公家之事知無不為專擅在吾不
聞諸人沮者軍法從事即日迴軍令子弘及整馳驛奏
帝見弘等甚悅曰汝父擅赴國難乃誠臣也授弘通議
大夫整公路府鷹揚郎將乃降璽書於護兒曰公于旋

師之時是朕敕公之日君臣意合遠同符契象此元惡
勒名太常非公而誰於是護兒與宇文述破玄感於閔
鄉斬平之還加開府儀同三司賜物五千段黃金千兩
贈父法敏東陽郡太守永寧縣公十一年又率師渡海
破高麗奢卑等二城高麗舉國來戰護兒大破之將趣
平壤高元震懼使執叛臣斛斯政詣遼東城下請降帝
許之詔護兒旋軍護兒集衆軍謂曰三度出兵未能平
賊此還不可重來今高麗困弊野無青草以我衆戰不

日克之吾欲進兵徑圍平壤取其僞主獻捷而歸也拜表請行不肯奉詔長史崔君肅固爭以為不可護兒曰賊勢破矣吾在閫外事合專決

隋書曰吾在閫外事合專法豈容千里稟聽成規俄頃之間動失機會勞而無功固其宜也

寧征得高元還而護譴捨此成功所不能矣君肅告眾曰若從元帥違拒詔書必當奏聞諸將懼乃同勸還師方奉詔及帝於雁門為突厥所圍將選精騎潰圍出護

兒及樊子蓋並固諫乃止十二年駕幸江都護兒諫曰
自皇家受命薄賦輕徭戶口滋殖陛下以高麗逆命稍
興軍可百家無知易為容怨在外羣盜往往聚結車駕
遊幸深怨非宜伏願駐駕洛陽與時休息出師命將掃
清羣醜上稟聖策指日克除陸下令幸江都是臣衣錦
之地臣荷恩深重不敢專為身謀帝聞厲色起數日不
得見後怒解方被引入謂曰公意乃爾朕復何望護兒
不敢言尋代宇文述為左翊衛大將軍及宇文文化及構

逆深忌之是日旦將朝見執護兒曰陛下今何在左右
曰今被執矣護兒嘆曰吾備位大臣荷國重任不能肅
清凶逆令王室至此抱恨泉壤知復何言乃遇害護兒
重然諾敦交契廉於財利不事產業行軍用兵特多媒
笑每覽兵法曰此亦豈異人意也善撫士卒部分嚴明
故咸得其死力子十二人弘金紫光祿大夫而左光祿
大夫整尤驍勇善撫御討擊羣盜所向皆捷諸賊歌曰
長白山頭百戰場十十五五拖長鎗不畏官軍千萬衆

只怕榮公第六郎至是並遇禍子姓死者十人唯少子
恒濟二人免

樊子益字華宗廬江人父儒侯景之亂奔北齊位仁州
刺史子益仕齊位員外散騎常侍周武帝平齊授儀同
三司隋文受禪以儀同領鄉兵後除樅陽太守平陳之
役以功加上開府歷循州總管許便宜從事十八年入
朝奏嶺南地圖賜以良馬雜物加統四州令還任所遣
光祿少卿柳謩之餞於灞上煬帝即位授銀青光祿大

夫武威太守以善政聞詔褒美之大業五年駕西巡將
入吐谷渾子蓋以彼多瘴氣獻青木香以禦露霧及還
謂曰人道公清定如此否子蓋謝曰臣安敢清止是小
心不敢納賄耳命賜口味百餘斛加右光祿大夫子蓋
曰願奉丹陛

隋書載子蓋曰臣常為外臣未居內職不得陪屬車
奉丹陛溘死邊城沒有餘恨

帝曰公侍朕一人耳委以西方則萬人敢宜識此心六

年朝於江都宮帝謂曰富貴不還故鄉真衣繡夜行耳
因敕廬江郡設三千人會賜米麥六千石使詣墳墓宴
故老當時榮之除戶部尚書時處羅可汗及高高昌王
款塞復以子蓋檢校武威太守應接二蕃加左光祿大
夫九年駕復幸遼東命子蓋東都留守屬楊玄感逼城
子蓋遣河南贊務裴弘策逆擊之反為所敗遂斬弘策
以徇國子祭酒楊汪小不恭子蓋又將斬之汪拜謝頓
首流血久乃釋三軍莫不戰慄將吏無敢仰視玄感每

盡銳攻城子蓋徐設備禦至輒摧破會來護兒等救至
玄感乃解去子蓋凡所誅殺萬人又檢校河南內史駕
至高陽追詣行在所帝勞之以比蕭何寇恂如光祿大
夫封建安侯賜女樂五十人謂曰朕遣越王留守東都
示以皇枝磐石社稷大事終以委公特宜持重戈甲五
百人而後出此勇夫重閉之義無賴不軌者便誅鉏之
凡可施行無勞形迹今為公別造玉麟符以代銅獸又
指越代二王曰今以二孫委公與衛文昇耳宜選貞良

宿德有方幅者教習之於是賜以良田甲第十年駕還東都帝謂子蓋曰玄感之反神明故彰公赤心耳析珪進爵宜有令謨是日進爵為濟公言其功濟天下特為立名無此郡國也後與蘇威宇文述陪宴積翠池帝親以金盃屬子蓋酒曰良美嘉謀俟公後動即以此盃賜公用為永年之瑞十一年從駕至雁門為突厥所圍帝欲選精騎潰圍出子蓋及來護兒諫

隋書載子蓋諫曰陛下萬乘之主豈宜輕脫一朝狼

猥雖悔不追未若守城以挫其銳四面徵兵可立而待

因垂泣願暫停遼東之後以慰衆望聖躬親出慰撫厚為勲格人心自奮不足為憂帝從之後援其至鹵乃去納言蘇威追論勲格太重宜在斟酌子蓋執奏不宜失信帝曰公欲收物情耶子蓋不敢對從駕還東都時絳郡賊敬繁陀柴保昌等阻兵數萬汾晉苦之詔子蓋進討時人物殷阜子蓋不別善惡汾水北村塢盡焚之民

大駭相率為盜其歸首者無少長悉坑之擁數萬衆經
年不能破賊詔徵還又將兵擊宜陽賊以疾停卒於東
京帝悲傷久之顧黃門侍郎裴矩曰子蓋臨終何語矩
曰子蓋病篤深恨雁門之恥帝歎息令百官就弔贈開
府儀同三司諡曰景會塋萬餘人武威吏民間其死莫
不嗟痛立碑頌德子蓋無他權畧在軍持重未嘗負敗
蒞官明察下莫敢欺嚴酷少恩果於殺戮臨終日見斷
頭鬼前後重沓為之厲云

周羅暉字公布九江潯陽人父法暉仕梁至南康內史
羅暉年十五善騎射好鷹犬任俠放蕩收聚亡命陰習
兵書從祖景彥誠之曰吾世恭謹汝獨放縱若不喪身
將滅吾族羅暉終不改後從大都督吳明徹與齊師戰
於江陽流矢中在目齊師圍明徹於宿預諸軍相顧莫
有開心羅暉躍馬突進莫不披靡太僕卿蕭摩訶副之
斬首不可勝計進師徐州與周將梁士彥戰於彭城摩
訶臨陣墮馬羅暉進救拔於重圍內勇冠三軍明徹之

敗羅暉全衆歸後以軍功除右軍將軍總檢校揚州中
外諸軍事賜金銀三千兩盡散將士分賞驍雄陳孝宣
深歎美之兩進爵至始安縣侯後除使持節都督豫章
十郡諸軍事豫章內史獄訟庭決不關吏手民懷其惠
立碑頌德至德中除持節都督南川諸軍事江州司馬
吳世興密奏羅暉甚得民心擁衆嶺表意在難測陳主
惑之蕭摩訶魯廣達等保明之外有知者或勸其反羅
暉拒絕之還除太子左衛率信任愈重時參宴席陳主

曰周左率武將詩每前成文士何為後也都官尚書孔
範曰周羅暉執筆製詩如上馬入陣不在人後自是益
見親禮及隋伐陳羅暉都督巴峽緣江諸軍事以拒秦
王俊及陳主被擒上江猶不下晉王廣遣陳主手書命
之羅暉與諸將大臨三日放兵士散然後降文帝慰喻
之許以富貴羅暉垂泣曰本朝淪亡臣無節可紀陛下
所賜護全為幸富貴榮祿非臣所望帝甚器之賀若弼
謂曰聞公鄴漢捉兵即知揚州可得王師利涉果如所

量羅睺曰若得以公周施勝負未可知也其年秋拜上儀同三司鼓吹送宅先是陳裨將羊翔歸降使為鄉導位至開府班在羅睺上韓擒虎於朝堂戲之曰不機知變位在羊翔下羅睺答曰昔在江南久承令問謂公天下節士今日所言殊匪人臣之務擒虎有媿色歷幽涇二州刺史皆有能名開皇十八年征遼東徵為水軍總管自東萊汎海趣平壤遭風舟多漂沒無功而施十九年突厥達頭可汗犯塞從楊素致討羅睺先登大破之

隋書曰時鹵衆甚盛羅睺白素曰賊陣未整請擊之
乃與輕勇二十騎直衝鹵陣從申至酉短兵屢接大
破之

進大將軍仁壽元年賜爵義寧郡公煬帝即位授右武
侯大將軍副楊素討平漢諒諒進大夫將軍軍及陳主
卒羅睺請一臨哭帝許之哀經送至墓塋還釋服方入
朝帝甚嘉尚之世論稱其有禮時諒為黨據絳晉等三
州未下詔羅睺行絳晉呂三州請軍事進兵圍之中流

矢卒送柩還京行數里無故輿馬自立策之不動有飄
風旋遶絳州長史郭雅稽首祝曰公恨小寇未平邪尋
即除殄無為戀恨是時風靜馬行見者莫不悲歎其年
七月子仲隱夢羅睺曰我明日當戰其靈坐所有弓箭
刀劍無故自動若人帶持伏絳州城隅是其日也贈柱
國右翊衛大將軍謚曰壯

周法尚字德邁汝南安成人父炅定州刺史法尚少果
勁有風槩好讀書書父卒後監定州事督父本兵數有

戰功為散騎常侍領齊昌郡事既而其兄武昌縣公法僧代為定州刺史法尚與長沙王叔堅不相能叔堅言其將反陳孝宣執禁法僧發兵欲取法尚其下將事皆勸歸北法尚遂歸周拜開府順州刺史封歸義縣公賜良馬五匹女妓六人綵物五百段加以金帶陳將樊猛濟江討之法尚遣部曲督韓朗詐為背已奔陳偽告猛曰法尚部兵不願降北若得軍來必無聞者猛引師急進法尚設奇兵大破之

隋書曰猛引師急進法尚陽為畏懼自保於江曲猛
陳兵挑戰法尚先伏輕舸于浦中又伏精銳於古北
村自張旗幟迎流拒之戰數合偽退登岸投古村猛
舍舟逐之法尚又疾走行數里與村北軍合猛退走
赴舟既而浦中伏舸取其舟建周旗幟猛因是大敗
猛僅以身免隋文為丞相司馬消難舉兵陰遣上開府
段珣攻圍之外無救援法尚棄城走消難鹵其母弟及
家累三百人歸陳及文帝受禪拜巴州刺史破三鴟叛

蠻復從柱國王誼擊走陳寇遷衡州總管改封譙郡公
後帝幸洛陽召之賜金鈿酒鍾一雙良馬十五匹給鼓
吹一部法尚固辭帝曰公有大功於國特給鼓吹者欲
公卿知朕寵公也轉黃州總管使經略江南及伐陳之
役以行軍總管隸秦王俊

隋書曰法尚率舟師三萬出樊口陳城州刺史熊門
超出師拒戰擊破之擒超於陣

遷永州總管安集嶺南仍給黃州兵三千五百人為帳

內前後賞賜甚厚轉桂州總管仍嶺南道安撫大使後
數年入朝以本官宿衛未幾桂州人李光任反令法尚
與上柱國王世積討之法尚發嶺南兵世積徵嶺北軍
俱會尹州世積所部多遇瘴不能進頓於衡州法尚獨
討之捕得其弟光略光度追斬光仕

隋書曰光仕率勁兵保白石洞法尚捕得其弟大獲
家口其黨有來降者輒歸其妻子居旬日降者數千
人法尚遣兵列陣以當光仕親率奇兵蔽林設伏兩

陣始交法尚馳擊其柵柵中人皆走散光仕大潰遂斬之

平之仁壽中遂州獠叛復以行軍總管討平之雋州烏蠻反詔法尚便道討擊破之

隋書曰法尚軍將至賊棄州城散走山谷捕不能得法尚遣使慰諭假以官號偽班師日行二十里軍再舍潛遣人覘之知其首領盡歸柵聚飲相賀法尚遣步騎數千襲擊破之

煬帝嗣位遷定襄太守進金紫光祿大夫時帝幸榆林
法尚朝於行宮內史令元壽言於帝曰漢武出塞於旗
千里今御營外請分為二十四軍日別遣一軍發相去
三十里旗幟相望鉦鼓相聞首尾連注千里不絕法尚
曰兵亘千里動問山谷卒有不虞四分五裂腹心有事
首尾未知雖有故事此取敗道也帝不懌曰卿以為如
何法尚曰請為方陣四面外拒六宮及百官家口並住
其間若有變當頭分抗內引奇兵出外奮擊車為壁壘

重設鉤陳此與據城何異

隋書曰若戰而捷抽騎追奔或戰不利屯營自守

此萬全策也帝曰善明年黔安夷向思多反殺將軍鹿
愿圍太守蕭造法尚與將軍李景分路討之法尚破思
多於清江及還從討吐谷渾法尚別出松州道逐捕亡
散至於青海兩遷至會寧太守遼東之後以舟師指朝
鮮道會楊玄感叛與宇文述來護兒等破之以功進授
右光祿大夫時齊郡人王薄孟讓等為盜保長白山法

尚頻擊破之明年復臨滄海在軍遇疾

隋書曰法尚在軍疾甚謂長史崔君用曰吾再臨滄海未能利涉立志不果命也

卒贈武衛大將軍謚曰僖子紹範知名

衛玄字文昇河南洛陽人父擢侍中左武衛大將軍玄少有器識周武帝在藩引為記室及親總萬機賜以萬釘寶帶累遷開府儀同三司大府中大夫仍領京兆尹稱為強濟隋文受禪坐事免官尋拜嵐州刺史會起長

城之後詔玄監督之仁壽初山獠作逆以玄為賓州刺史鎮撫之玄到官時獠攻圍太牢鎮玄單騎造其營謂羣獠曰我是刺史銜天子詔安養汝等汝等勿驚諸賊莫敢動於是說以利害渠師感悅解兵歸附者十餘萬口帝大悅賜縑二千匹除遂州總管仍令劍南安撫煬帝即位徵為衛尉卿獠夷攀戀數百里百絕因與之決並揮涕去遷工部尚書後拜魏郡太守尚書如故

隋書載帝謂玄曰魏郡銜要民多奸究是用煩公此

郡去都非遥宜數往來詢謀朝政賜物五百段而遣之

轉刑部尚書遼東之役檢校右御衛大將軍帥師出增
地道時諸軍多不利玄獨全衆還拜金紫光祿大夫九
年駕幸遼東西恭帝以代王留守京師命玄同守拜為
京兆內史尚書如故許便宜從事敕王待以師傅禮會
楊玄感圍東都玄率步騎七萬援之至華陰掘楊素冢
焚骨夷塋示士卒必死既出潼關議者恐峭函有伏兵

請於陝縣沿流東下直趨河陽以攻其背玄曰此計非
豎子所及遂鼓行而進既度函谷卒如所量乃遣虎賁
郎將張峻為疑軍於南道玄以大兵直趨城北玄感逆
拒之且戰且行屯軍金谷掃地而祭文帝曰

隋書載玄祭文曰楊玄感負恩躬為蛇豕蜂飛蟻聚
犯我王畧臣二世受恩一心事主董率熊羆志梟凶
逆

若社稷靈長宜令醜徒冰碎如大運去矣幸使老臣先

死詞氣激揚三軍莫不涕咽時衆寡不敵與賊頻戰不利死傷大半

雜記曰每戰方接官軍皆坐地棄甲以白布裹首聽賊所掠先後十三戰俱不利

玄苦戰賊稍却進屯北邙會文文述來護兒等援兵至玄感西遁玄遣通議大夫斛斯萬善監門直閤龐玉前鋒追之及于閭鄉與宇文述等合擊破之駕至高陽徵詣行在所帝勞之曰社稷也使朕得無西顧之憂進右

光祿大夫賜以良田甲第資物鉅萬還鎮京師帝謂曰
關右之任一委於公公之安危乃社稷安危出入須有
兵衛坐卧恒宜自牢今特給千兵以充侍從與樊子蓋
俱賜玉麟符以代銅虎十一年詔玄撫關中時盜賊蜂
起百姓饑饉玄竟不能救恤而官方壞亂貨賄公行以
年老乞骸帝遣內史舍人封德彝馳喻之曰京師國本
宗廟園陵所在藉公卧鎮玄乃止唐師入關自知不能
守憂懼稱疾不知政事城陷歸家義寧中卒

劉權字世略彭城豐人少有俠氣重然諾藏亡匿死吏不敢過門後折節好學動循法度仕齊位行臺郎中齊亡仕周隋開皇中以車騎將軍領鄉典兵從晉王廣平陳進授開府儀同三司賀若弼甚禮之十二年拜蘇州刺史賜爵宋城縣公時江南初平權撫以恩信甚得民和煬帝嗣位進銀青光祿大夫大業五年從征吐谷渾權出伊吾道逐賊青海乘勝至伏俟城帝復令權過曼頭赤水置河源郡積石鎮大開屯田留鎮西境在邊五

年諸羌懷附貢賦歲入吐谷渾餘燼遠遁道路無壅徵
拜司農卿尋為南海太守行至鄱陽會郡盜起不得進
詔權召募討之權率兵遇賊不與戰先乘單舸詣賊營
說以利害羣賊感悅一時降附帝聞而嘉之及至南海
甚有異政數歲盜羣起羣豪願推權為首權竟固守拒
之子世徹又密遣人賫書詣權稱四方擾亂諷令舉兵
權召集佐寮對斬其使竟無異圖守之以死卒官世徹
個儻不羈頗為時人所許大業末羣雄並起世徹所至

處輒見忌多拘禁之後竟為兗州賊帥徐圖朗所殺

李景字道興天水休官人父超周應戎二州刺史景容貌奇偉膂力過人美鬚髯驍勇善射平齊之後頗有功授儀同三司後以平尉遲迥進開府隋開皇九年以行軍總管從王世積伐陳以功進上開府及高智慧等反復以行軍總管從楊素擊之還授鄜州刺史十七年遼東之役為馬軍總管及還配事漢王文帝奇其壯武使祖而觀之曰卿相表當位極人臣尋從史萬歲擊突厥

於太斤山別路邀賊人破之彼與上明公楊紀送義城
公主於突厥至恒安遇突厥來寇時代州總管韓洪為
鹵所敗景率所領數百人力戰三日殺鹵甚衆仁壽中
檢校代州總管漢官諒起事景發兵拒之諒頻遣劉嵩
喬鍾蔡等攻之景率士卒殊死戰屢挫賊鋒

隋書曰諒遣劉嵩襲景戰於城東升樓射之無不應
弦而倒選壯士擊之斬獲略盡諒復遣嵐州刺史喬
鍾葵率勁勇三萬攻之景戰士不過數千加以城池

不固為賊衝擊崩毀相繼

司馬馮孝慈司法參軍呂王並驍勇善戰儀同三司侯
莫陳人多謀畫工拒守術景推誠此三人無所闕預惟
在閣持重時出撫循而已及朔州總管楊義臣援兵至
合擊大破之先是府內井中甃上生花如蓮井有龍見
時變為鐵馬甲士又有神人長數丈見城下跡長四尺
五寸景問巫者巫者曰此不祥之物來食血耳景大怒
推出之旬日兵至死者數萬景尋被徵進柱國拜右武

衛大將軍賜女樂一部景智略非長而忠直為時許帝甚信之又擊破叛蠻向思多明年擊吐谷渾於青海破之進光祿大夫五年駕西巡至天水景獻食帝曰公朕主人也賜坐齊王暕上隨帝至隴川宮帝將大獵景與左武衛大將軍郭衍俱有難色為人所奏帝大怒令攝之竟坐免歲餘復位與宇文述等參掌選舉明年攻高麗武厲城破之八年出渾彌道九年復出遼東及旋以景為殷高麗追兵大至景擊走之進爵滑國公楊玄感

反朝臣子弟多預景獨無關涉帝曰公誠直天然我梁棟也賜以美女帝每呼李將軍而不名十二年帝令景營遼東戰具於北平賜御馬一匹名師子駘時盜賊蜂起景遂召募以備不虞虎賁郎將羅藝與景有隙誣景將反帝遣其子慰諭曰縱人言公闕天關據京都吾無疑也後為高開道所圍獨守孤城士卒患脚腫死者十六七景撫循之一無離叛遼東軍資多在其所粟帛山積景無私焉及帝遇弒江都遼西太守鄧暠救之遂歸

柳城將還幽州遇賊見害

噫等死耳惜哉景不死於江都之難也

契丹韃韞素感其恩聞之莫不流涕幽燕人士於今傷
惜

薛世雄字世英本河東汾陰人其先寓居敦煌父回仕
周開皇初封舞陰郡公領漕渠監世雄兒童時與羣輩
戲輒畫地為城郭令諸兒為攻守勢不從令者輒撻之
諸兒畏憚莫不齊整父見而奇之謂人曰此兒當興吾

家年十七從周武帝平齊以功拜帥都督隋開皇中累遷右親衛車騎將軍煬帝嗣位從征吐谷渾進通議大夫世雄性廉慎行軍破敵之處秋毫無犯帝嘉之嘗謂羣臣曰欲舉好人諸君識否咸曰臣等未測聖心帝曰我欲舉薛世雄羣臣皆稱善於是超拜右翊衛將軍歲餘為玉門道行軍大將軍與突厥啟民可汗連兵擊伊吾師次玉門啟民背約兵不至世雄孤軍度磧伊吾懼請降世雄遂於漢舊伊吾城築城號新伊吾留銀青光

祿大夫王威鎮之而還進正議大夫遼東之後為沃沮
道將軍與宇文述同敗於平壤還次白石山賊圍之百
餘重四面矢下如雨世雄以羸帥為方陣選勁騎二百
縱擊破之而還所亡矢多竟坐免明年復征遼東拜右
侯衛將軍兵指蹋頓道至烏骨城會楊玄感反班師十
年復從帝王遼東遷左禦衛大將軍仍領涿郡留守未
幾李密逼東都詔世雄率幽薊精兵將擊之次河間營
於城南竇建德率精脫數百夜來襲之大敗

新唐書曰隋右翊衛將軍薛世雄督兵三萬討建德屯河間七里井建德以勁兵伏旁澤中悉拔諸城偽遁世雄以為畏稍弛備建德率敢死士千人襲之會大霧晝冥跬步不可視隋軍驚遂潰相騰藉死者如邱世雄引數百騎亡去盡得其衆 革記命曰帝以李密在洛口征遼回日今世雄於留鎮兵內簡練精銳及幽易驍勇討密經過處若有草竊隨便誅剪仍令王世充等諸軍並取世雄處分世雄乃自領精兵

六萬至河間郡城下立營州縣皆備牛酒軍糧以待
時建德無糧兵士先皆分散餘軍不滿千人在武強
縣境收麥充食聞世雄兵至河間惶懼無計乃問一
女巫欲走避之如何巫云不免問欲首如何巫云亦
不吉問欲掩其不備擊之如何巫云今夜天未明到
大吉卜時日巳午卜處去河間一百四十里建德簡
精兵二百八十人先行餘勒續發建德與衆決云夜
到即攻明即降之吉凶在此舉耳遂行去世雄營二

里天已屬明又聞吹角聲建德惶惑欲降須臾大霧
忽起建德曰天助我也引兵入營攻之兵大亂世雄
左右先已裝束擬發世雄遂上馬奔走仍中數槍僅
免

世雄與左右數十騎遁入河間城慙恚發病歸涿郡卒
子萬述萬淑萬鈞萬徹萬備並以驍武知名

論曰段文振有周之日早以武毅見知隋氏之初又以
幹力受委任兼文武稱為諒直其高位厚秩非虛致也

段文振負國棄母甘附權臣忠孝兩虧何以不加指摘
來護兒幼懷倜儻猛槩抑揚晚致動王馳驅畢力樓船
刺勝掃勍敵如拾遺闕鄉討亂剪兇魁如摧朽位班上
將顯居大國道消遘難忠至不渝惜矣子蓋雅有幹局
質性方嚴見義而勇臨機能斷保全邦邑勒亦懋哉羅
喉忠亮之性所在稱重送往之節義感人臣死而有知
乃結草之義法尚征伐四夷亦足嘉焉文昇東都解圍
頗亦宣力西京居守政以賄成鄙哉鄙哉劉權淮楚舊

族雄名早著時逢擾攘任等尉他遂能拒子邪言足驗
誠臣之節李薛並以驍武之用當有事之秋致茲富貴
可謂自取時迹遺蹟良有命乎

南北史合注卷一百六十二